

ARLeF: Massimo Racozi al fasarà il video de ultime creazion di Dj Tubet

Cu la poie de ARLeF peraulis e musiche a saran animadis intun videoclip par promovi uficialmentri la Fieste de Patrie 2016

Massimo Racozi di Monfalcon al è il **vincidôr dal concurs** di ideis inmaneât de Agenzie Regjonâl pe Lenghe Furlane **pe realizazion dal video de cjançon di Dj Tubet “No sta a contâmi dome chê storie” che al deventarà il filmât uficiâl de Fieste de Patrie dal Friûl** dai 3 di Avrîl dal 2016. La Comission tecniche sientifiche de Agenzie, fra i siet presentâts, e à sielzût il lavôr dal architêt, regjist, senegjatôr e ilustradôr che, in colaborazion cun Stefania Carlotta Del Bianco e Maurizio Mattiuzza che a àn colaborât al progjet, al doprarà i 7mil euros vinçûts par compagnâ cu la animazion lis peraulis di Dj Tubet cuntune storie ideade e realizade doprant la tecniche dal dissen animât fat a man.

“Sielzi nol è stât sempliç – al à vût dite il president de ARLeF, Lorenzo Fabbro – dal moment che dutis lis propuestis rivadis a jerin di alte cualitât. Ae fin la Commission, cun acuardi unanim, e à fat buine la propueste di Racozi, stimade come la plui adate a trasmeti i contignûts e i valôrs de cjançon di Dj Tubet”.

In passât, Racozi al à lavorât par aziendis di impuartance nazionâl (Parmalat) e cun artiscj ancjetant famôs: Elisa e Il Volo, e ancje cui furlans Luna e Un Quarto pal progjet su Primo Carnera. I siei lavôrs a son stâts presentâts in siet mostris, al à vinçût doi concurs regjonâi dedicâts al fumut e al à fat la senegjature di passe 30 spetacui metûts in sene in Fvg e in Venit.

Fra chei altris sîs concorints, dongje di trê furlans e je di segnalâ la partecipazion di un video maker puliês, un milanês e un venit. La gnove creazion artistiche di Dj Tubet e à come suaze la storie di un soldât in trincee dilunc de I Vuere Mondîal che, inte spiete dal gnûf ordin di atac, al ripasse lis tapis plui impuartantis de storie dal Friûl fasint cussì une piçule riflession su la vuere, la pâs e lis propriis lidrîs.

Udin, ai 15 di Fevrâr dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<